

FAKE

NEWS: Woher oder glooge?

Die Fake News sy ä wohri Ploog
und schtelle alles hütt in Froog.
Woher oder falsch – s'isch biireweich,
und d'Lütt, die glaube jede Seich.
Dr Raoul und e Hampfle Altstadtrot
finde dr Bahnhofcorso blöd.
Au dr Biblio-König Gerhard Matter
möcht vor sym Rych grad nummen äs Gatter.
Er hett dä neu Tower so uf dr Latte,
dä gäbi sym Büro eifach z vill Schatte!
Die schtarke Lieschtler bringen ä Fake mit Chrott.
Aber die wird nit gschluckt – dä Flyer isch Schrott!
Schtimmt die Mäldig, oder isch si lätz,
im Ziegelhof heig's gniegend Parking-Plätz?
Isch's ä Fake, dass es Mänge söll reize,
dass dr Erdal bald wirtet in allne Beize?
Jetzt isch grad die Mäldig ynecho:
Dr Glych heig au dr «Ängel» überneh.
Das isch ä Fake – dues schnäll vergässe!
Niemer will immer s'glych Menü frässe.
Kennsch dr beschi Alphornblöser?
Nei, nit dä vo Saanemöser!
Dr Boulevard-Beizer näben em Törli,
dr Platzhirsch mit sym grosse Schnörli.
Lut News wird dä Becker und Oberkneipper
am Basler Tattoo zum «Lonely Piper»!
Schtimmt das, Papi, frogt äs Chind,
d'SVP heig ä Brätt vor em Grind?
Do isch scho ä bitz öbbis dra –
Die hei halt au ä Burka a.
Dr Wirtschafts-Buser, dä Oberlesser
weiss alles. Nei, weiss alles besser!
Er duet eusi BL-Zukunft profezeye,
kei Fake: Er cha sogar schwarz lo schneye!
Schynt's well er, ohni sich z schyniere,
syni Sippschaft mit dr Uriella fusioniere.
Z'Basel bloost ä scharfe Wind
gegen ä Frau mit Name Gschwind. **facebook**
Isch's ä Fake oder will me sich räche,
dass sie nütt me an d'Uni wott bläche?
Die gängigi Meinig, d'Bebbi syge stur
isch falsch. D'Fasnacht die isch Wältkultur!
Au kei Fake isch d'Wahl vom Lukas Ott
zum Schtadtentwickler – oh mein Gott!
Die Mäldig isch dr gröschti Shit:
D'Sabine dänki an Rücktritt.
Fake News sy das, nüt vo «Tschau»,
am Sässel chläbt die gueti Frau!
Isch's ä Luug oder isch es woher,
dr Trump heigi schynts goldigi Hoor?
Die düege sys Hirni ganz schön beschwere,
drum duet är alles underobsi cheere.
#Metoo isch kei Fake, nei, ä Skandal!
Für d'Fraue sy d'Manne ä totali Qual.
Und d'Männer schtönde jetz am Pranger
als immergeili Aanelanger.
Fake News: Dr Weinstein isch än Ängel,
Nei, dä isch ä schlimme Bängel!
Kei Fake, es schtöht in jedem Ticker:
Är syg dr schlimmschi Starlet-Küsser.
S'Doris wird dört unde z'Brüssel
Abschmutzt vom än alte Rüssel.
Kei Fake, denn d'Junker-Schmütz, die sy so nass
wie-n-ä grosses Bier vom Fass.
Dr neuschi Fake in alle News:
D'Chlütterer löje d'Fasnacht us.
Anstatt nach em Umzug dr Chrapf im Wädli,
gniesse si lieber äs Wellness-Bädli.
Me brichtet im Schteditli, stelled euch vor,
d'Chlütterer mieche in däm Johr
gar kei Fasnecht, syge z alt,
und chönne nüm, so syg das halt.
Derby sy das, hösch, chunnsch du druus,
schlicht nüt anders als Fake News.
Mir sy derby und stönden y
und pfyffen eine zwüschedry.
Sälbscht wenn's bi de Buure hüppleret,
und öppen ein dernäbe böbberlet,
**dasch alles glych, dr Case au wörscht,
bi eus gilt hütte: Chlütterer förscht!**

